



Шорно эл, порымлык да гын берр!

21-ше (3253) №,  
2016 ий 21 май,  
шуматкече.

# ЯМДЕ ЛИЙ

1933 ий 1 февраль годсек лектеш.



27 май – Россияысе библиотеке-влакын кечышт



## Книга кугыжаныш



Нужъял

тўн школыс лудмыверыште 13 тўжем 457 книга аралалтеш. Ты кугыжанышым Е.А.Гордеева (снимкыште) вуйлата. Икшыве-влакым лудаш кумыландаш манын, Екатерина Андреевна «Самырык библиотекарь» кружокым чумырен. Книгам лудмо почеш сўрет конкурсым, тестым, анкетированийым эртарам. Тунемме ийым иктешлыме деч ончыч эн шуко лудшо-влакым палемденыт. Тиде Даша Виноградова (1-ше кл.), Полина Суворова (3-шо кл.), Полина Соколова, Катя Рябчикова (4-ше кл.), Настя Мурадова, Лада Вершинина (5-ше кл.). А теве Рома Казаков ден Максим Кудрявцев кажне перерыв годым лудмыверыш пурен лектыт. Йоча-влак книган ушан, поро кагашым пуышо йолташ, шўм-чоным паремдыше эмлызе улмыжым раш умылат.

**Л.ГРИГОРЬЕВА** ямдылен.

Медведево район.

Фотом школын архивше гыч налме.

Н ы л ы м ш е

Уверлан уло вер

к л а с с ы ш т е

тунемше 1,2 миллион икшыве

Всероссийский тергыме пашам

тений икымше гана возен.

Тышке Россияысе тўрлў

регионысо 30 тўжем наре

школ ушнен. Йоча-влак

руш йылме, математике,

окружающий мир пред-

метла дене шинчымашыш-

тым тергеныт.

\*\*\*

Марий Эльсе районлаште

стадион-площадке-влакым

чогаш тўналтыт. Тидлан 30,4 мил-

лион теҥге ойыралтеш. Кужеҥер

посёлкышто, Азаново селаште

(Медведево район) ышташ палемдыме.



12-22 майыште «Ямде лий» газетлан шўлдырак ак дене возалташ лиеш. Индексше – В8574





## Уверлан уло вер

Руш Географический Обществын (РГО) увертарыме конкурсышто Марий Эл гыч Настя Домрачева (У Торъял, Немда), Костя Ласточкин (Йошкар-Ола) да Игнат Мокеев (Звенигово, Мочалище) сеңышыш лектыныт. Нуно «Смена» всероссийский йоча рүдериште канаш тўналыт, кумдан палыме путешественник, учёный-влак дене вашлийыт, теңыз воктенысе пўртўсым эскерат.

\*\*\*

Йошкар-Ола гыч Антон Алимов Москвасе военно-музыкальный училищыште тунемеш. Суворовец Йошкар площадкысе Сеңымаш парадыште кумшо гана участвоватлен. Тудо барабанщик-влак рото дене эртен.



## Сеңымаш кече

У Арбан йочасадыш коштшо ньога-влак Сеңымаш кече пайремлан чот ямдылалтыныт. Тыныс илыш верч вуйым пыштыше кугезе коча-кова-влак нерген каласкаленыт. Мурым муреныт, почеламутым ойленит (снимкыште), сўретым сўретленыт.

**И.В.НИКИТИНА,**

**воспитатель.**

**Медведево район.**

## Курчак артист пеш онай!

Туныктышына - влак Л.В.Максимова ден Э.В.Яковлеван вуйлатымышт

Йошкар-Олаш мийышна. Курчак театрыште кукольникын кечыже ыле. Меат ширме шенгеч курчак-влакым артист семынак модыктенна. Фокусник дене пырля икмынар фокусым ыштенна. Сўретче-влак ўдыр-шамычын чуриешышт тўрлў пеледышым, лывым, пырысым сўретленыт. Залыш пурен, Г.-Х.Андерсенын «Дюймовочка» спектакльжым онченна.

**Аня РОМАНОВА, 5-ше класс.**

**Звенигово, Эсмекплек.**



## Поро паша

Тумнымучаш селаште верланышеobelisk йырым эрыктышна, пеледышым шындышна (снимкыште). Тыршымынам ужын, мемнан деке Ольга Ивановна Петухова тольо, мўгинде дене сийлыш да поро пашалан тауштыш. Тудын йоча жапше Кугу Ачамланде сар годым эртен.

**Алёна РЫБАКОВА,**  
**8-ше класс.**

**Куженер, Конганур.**

## Майыште мардежат мура.



## Тыршыше воспитатель

Зинаида Филимоновна Соколова (снимкыште) Матародо селасе «Йомак» йочасадыште пашам тыршен ышта. Келге уш-акылан, кугу опытан воспитатель. Занятийлаште кидым, парням лывыргытыме гимнастикым, йылме лывыргылыкым вяндаш шуко тўрлў йўным кучылтеш.

Ача-ава-влак дене пенгыде кылым куча, пашам моштен виктара.

**С.МАКСИМОВА,**  
**Параньга район.**





## Наталья дене кугешнена

Наталья Васькина Урал кундемысе Изи Тавра школышто 1-ше классыште тунемеш. Изи гынат, школысо, районысо да областысе конкурслаште вийжым терга, ончыл верым налеш. Оренбург олаште эртаралтше «Дом, в котором все окна распахнуты в детство» Российысе конкурсышто сеныше лийын. Спорт гимнастике дене кылым куча, мураш пеш йората. Районышто эртаралтше патриот муро фестивальыште кокымшо верым налын, да жюри эше «За артистич-



ность» посна приз дене палемден. Изи Тавра клубышто да школышто кажне мероприятийыште мастарлыкшым ончыкта.

**Валерий БАКЕТОВ.**  
Свердловск область, Арти район.



## Тау, кочай!

Сенымаш кечылан пөлеклалтше пайремым «Мондалтдыме полк» акций дене тўнална. Сарыште кучедалше кочана-влакын портретыштым кучен, ял покшелне верланышеobelisk деке ошкылна. Тушто митинг эртыш. Ветеран Н.А.Асмаевын шарналтымыжым тўткын колыштна. Индешле кок ияш Никита кочай сарыш 1942 ийыште 18 ияш каен. Йошкар Шўдыр орден дене палемдалтын. Тыныс илышым арален кодымыштлан таум каласышна.

**Ксения КАПИСОВА.**  
Пошкырт кундем, Дёртыльё, Чарлак.

## Чонем пуэм

Марий тиштым аралымына, йымыжа шочмо йылме дене мутланымына, кугезе йўлам шуктен толмына ончыкыжым виянашна вий-куатым пуат. Тидым ме эре шарнена да марий улмына дене кугешнена. Вершўорнам перегена да жаплена. Шочмо кундемым чот йоратыман, кузе тидым Яныш Ялкайн ыштен: «**Чорай яллан чонем пуэм, тунаре ямле тусо мланде...**»

**Элеся АПЛАТОНОВА.**  
Пошкырт кундем,  
Мишкан район.



## Икгай улына

Школна мотор, кугу, волгыдо. Мемнам, 35 тунемшым, вич ял гыч школ автобус дене шупшыктат. Марий, татар, руш ўдыр-рвезе-влак тунемына. Татар ден руш марла ойлат, марийжат татарла, рушла кутыра. Школыштына тўрлө кружок уло: марий фольклор, бондарь, спорт, авиамоделирование. Чыла вережат кошташ тыршена. Конкурслаште чўчкыдын икымше верым налына.

**Коля ТАРАСОВ.**  
Татарстан, Мамадыш,  
Кугу Шия.

## Буймо

школын тунемшыже-влак виянда тагасымашлаште сеныше ултыт! Амалжераш: йочасад гычак капкылым шуарат.

«Йочасадыштына тазалыкым пенгыдемдыше «Патыр» программе дене пашам ыштена, сандене йоча-влак шуэн черланат», - ойла йочасад вуйлатыше Клара Геннадьевна Шамеева (снимкыште). Йоча-влак кажне кечын яндар южышко лектыт, зарядкым ыштат, куржталыт, йўштө вўд дене йолым мушкыт, витаминлан поян кочкышым кочкыт, шудо чайым йўйт. Тиде паша 20 ий наре шуйна.

**Любовь МИХАЙЛОВА.**  
Татарстан кундем, Агрыз район.



## Амалже – «Патыр»



Оласе  
марий йоча



## «Шокто, гармонь» кундемнам чапландара

Эх, нине ўдыр-рвезе-влакын (снимкыште) сценыште мурен-куштымышт годым шўм-чон тунар куан тул дене темеш – шомак дене каласен мошташат ок лий. Койышланен тавалтымышт, шыр-гыжалын муралтымышт, шкем сценыште моторын кучымышт, тўрлў куштымашлан келшыше вургемышт – икманаш, чылажат кугешнаш таратыше. Шомакем «Шокто, гармонь» образцовый йоча фольклор ансамбль нерген. Тудо Марий Эл Республикысе йоча да самырык-влакын усталык полатышт пелен пашам ышта. Ансамблышке тўн шотышто Йошкар-Оласе 14-ше номеран гимназий, 21-ше номеран да вес школла гыч 7-15 ияш шўдў наре йоча коштеш. Коллективым 2004 ий гыч педагог-хореограф **Р.А.ИВАНОВА** (снимкыште покшелне) вуйлата.

– **Раисия Алексеевна, фольклорлан эрerten, Те йоча-влакым марий калык мурым, куштымашым, илыш йўлам перегаш туныктеда.**

– Тыге. Йочам изинек калык тўвыралан, сымык-

тышлан шўмандаш гын, тудо ончыкыжым культурын поянлыкшым, шочмо йылмын моторлыкшым палаш да аклаш тўналеш.

– **Руш йоча-влак коклаште кушшо ўдыр-рвезе-влакым марий тўвыра деке шўманден моштымо опыдат уло, очыни?**

– Эн ончыч ача-ава-влак дене умылтарыме пашам чот эртарыман. Варажым, нунын польшыштан эгертен, пашам ыштена. Кугурак ийготан йоча-влак изиракыштым туныктат. Ансамблыш вич ий коштмеке, тунемме курсым эртыме нерген кажне икшывылан сертификатим пуэна, а 9-ше класс деч вара свидетельством налыт.

– **Пашаштыда кугурак ийготан йоча-влакын польшышт нерген ойлышда. Кўмыт нуно улыт?**

– Тиде Егор Фёдоров, Аня Атлашкина, Женя Мамаев, Катя Гусева, Мария Тымбаршева (3-шо шк.). Ростислав Королёв гар-

### Историй гыч:

1988 ий – «Самырык баянист» калык семўзгар ансамбль пелен «Шокто, гармонь» йоча фольклор ансамбль шочын;

1997 ий – «Образцовый калык коллектив» лўмым налын;

2003 ий гыч «Образцовый йоча коллектив» лўмым нумалеш.

моньым сайын шокта. 11-ше классыште тунемше Ольга Васильева, Никита Мамаев ўшанле эгертышем улыт. Нуно Анапа оласе «Смена» всероссийский йоча рўдерыште каненят. Ўдыр-рвезе-влак 14-ше номеран гимназийыште шинчымашым погат.

– **Ансамбль тўрлў конкурс да фестивальлаште чўчкыдын лауреат але дипломант лиеш. Пытар-тыш кугу сенгыманда дене палдарыза.**

– Тений Йошкар-Олаште эртыше «Шанс» тўнямбал фестиваль-конкурсышто изирак да кыдалаш тўшка-влак дипломант лийыныт, а кугурак тўшка лауреат лўмым сенен налын. «Звёздный Олимп» тўнямбал конкурсышто кугурак ийготан-влак II степеня лауреат лийыныт. Тагасымаш Чебоксарыште эртен.

– **Умбакыжат ончышо-влакым мастарлыкда дене эре куандарыза. Марий улмына дене кугешнен, лўмнам чапландарыза.**

**Л.ГРИГОРЬЕВА**  
мутланен.

**Алевтина Константиновна, Егор Фёдоровын аваже:** «Олаште илыше марий ача-ава-влакын ўдыр-эргыштын сценыште мурен кушталтымыштым эре куанен ончем. Мылам «Шокто, гармоньыш» коштымо кажне икшыве шке йочам гай шерге да лишыл. Шкежат мураш-кушташ йўратем, гармоньым изиш шоктем. Садлан эргыжат марий тўвырам, сымыктышыым пален, кугезе йўлам жаплен кушшо, манын шонем».





### Мечым чумена

Шошым, лум шулымек, футбол дене модаш пеш сай. Йолташ-влак дене погынен, шүштö мечым куанен чумена. Меч почеш куржталын, тазалыкнам шуарена. Мемнам нимогай чер огеш сене.

Денис ИВАНОВ.

\* \* \*

«Сорванцы» мультфильмыште футболым йöратыше-влак нерген ойлалтеш. Мыят рвезе-влакын командыште модам. Мультфильмысе приём-влакым кучылтам.

Сергей КУШАКОВ.

Морко, Коркатово.



### Тидым палаш онай

15 майыште Йошкар-Олаште «Эвелин-2016» велопробег эртен. 300 утла велосипедист ола уремла дене вич меҥгым кудалын. Теат, педальым пүтырен моштышо-влак, тыгай онай акцийым шонен луктын кертыда.

«Эвелин» кум мутым ушымо дене ышталтын: «экологический», «велосипед» да «линий» (корно).



Школыштына «Самырык турист» кружок пашам ышта. Тудым Ольга Анатольевна Семёнова вуйлата. Тушто ме түрлö нелылыкым сенаш тунемына. «Ече туризм» район таҥасымаште латныл грамотым сенен налынна да икымше верыш лектынна. Тимур Кузнецов, Александра Оразаева, Валерия Смирнова, Нелли Сорокина, Азат Абдрахманов, Алексей Алексеев эн чолга турист улыт.

Юлиана ЕРМОЛАЕВА,  
Марий Турек,  
Сардаял.

### Турист-влак



### Футболист үдыр

Евгения йолташ үдырем футболла модаш йöрата. Школышто сайын тунемеш. Яра жапыште пырля модына. Евгения ончыкыжымат спортым ок кудалте манын, үшанем.

Ольга КУЗНЕЦОВА,  
Волжский, Кугу Корамас.

### Тале каратист

Куженер район Токтай-беляк школышто каратэ секций шукертсек виян пашам ышта. Александр Егорович Ельмикеев йоча-влакым изинек спортын тиде видшылан шүманда. Спортсмен-влак түрлö таҥасымаште сеныше лийыт. Тале каратист-влак кокла гыч иктыже – 7-ше классыште тунемше Родион СОКОЛОВ (снимкыште).

Тудо Тольятти олаште эртыше Юл кундем федерал округын каратэ дене таҥасымаште Марий Элын чапшым арален. Кандаш эн сай модшо-влак радамыш логалын. Тылеч посна йолташыже Денис Актуганов дене пырля шке гыч брейк-дансым тунемыт. «Тиде куштымашым Интернетыште, телеэкраныште ончена, шке гыч түрлö движенийым шонен луктына, – оила Родион. – Ондак шке тунемына, вара кумылан рвезе-влаклан туныктена». Родионлан спортын түрлö видше келша. Тудым урок деч вара кажне кечын школын спортзалыштыже ужаш лиеш.

Н.СЕМЕНОВАН фотожо.

Л.ГРИГОРЬЕВА.

### Увер

12 да 18 майыште Йошкар-Оласе «Дружба» стадионышто тунемше-влак коклаште «Президентский таҥасымаш» да «Президентский модмаш» эртеныт. Икымше этап годым таҥасымашке Марий Элысе школла гыч 47970 тунемше ушнен. Сенышыш лекше команд-влак Краснодар кундемыште верланыше «Смена» да «Орлёнок» йоча рүдерлаште республикынан чапшым аралаш тунемше.

Р.С.: Таҥасымаш-влак РФ Президентын күштымашыже почеш эртаралтыт.



**Туныктышылан  
ПОЛЫШ  
7-ше классыште  
лудшаш  
произведений**

**Ф**ельдшер Игнатий Павлович медпункт воктенак ила. Семон тудым сайын пала, Федя эргыж дене ик классыште тунемеш.

Фельдшерын пöрт омсажым Семон пыкше тўкалтыш. Мо-кузежым шўлешт-шўлешт каласкалыш, вара кўварвак лопток волен шинче.

Вий кодын огыл.

– Тый тышан код, теве Федя воктек пурен воч да мале. Мый тыманмеш ават деке миен шуам, – Игнатий Павлович, ўзгарым погалтен, содор лектын кайыш.

Но Семоным тыште ни-могай виат кучен ок сене. Федян аваже чарашат тöчыш, Семон ондалчык йöным муо. «Мый Коля чўчў дене малем», – мане.

Пел корным тудо сайынак эртыш, вара ошкылжо утыр да утыр эркышнаш тўнале. Вий йөршын пытен. Кок-кум гана тошкалеш – лум пургыжыш шунгалтеш. Пöрдалын, пыкше кынелеш. Ала-мо семын тунар чот кочмыжо шуын колта. Мөнгö марте миен шушашлат ок чуч. Семон чўч шинче. Йўштö. Каяш кўлеш. Но кузе?

Семонын пижергыжат нöрен. Ырыкташ манын, кылмаш тўналше кидшым кўсенышкыже шурале. Трук ала-мо пенгыде перныш. Мо?.. Луктын ончале... Шинчажлан ок ўшане – кинде курика. Кунам чыкен? Уке, ок шарне. Семон кукшо курикам кормыжтал кучыш, умшаж дек лишемден, сутланен кочкаш тўнале. Шытыр-шотыр веле шокта.

Тыманмеш кочкын пытарыш. Кенета уло мोगыржылан шокшо лийын кайымыла чучо, кид-йолыш вий шкак пура. Рвезе иктаж пел шагат гыч мөнгыштыжö лие. «Авай кузе?» – первый мутшо ыле тудын.

– *Найгаенит, больни-цыш. Трактор дене,* – Олюк пелен кодшо пошкудо ўдырамаш мане.

Семон эркын ўстел дек лишеме, тучеч кукшо кинде шултышым налын, тамлен кочкаш тўнале.

\* \* \*

## КИНДЕ ШУЛТЫШ

Вячеслав АБУКАЕВ-ЭМГАК



Ойлыман

Семон пўя вельш куржшо рвезын корныжлан тореш лекте.

– *Мо кўлес? Колто!* – йынгысаш тўнале тудыжо. – *Ынде ий ўмбалне модас лиес. Чо-от кылмен.*

– *Модаш шуат. Тый ондак тидым ончал. Палет, мо тугай?* – кудалтыме кинде шултыш тура йочам вўден кондыш.

– *Мо? Мо?.. Ачамлан каласем, колто-о!* – нюс-лаш тўнале рвезе.

– *Шого, шого, мо тиде тыйгай, палет?* – мландымбак ончыкта Семон.

– *Мо вара, кинде,* – нюс-лымым чарнен, Семоным келесырын онча ньога.

– *Кö кудалтен, от пале?*

– *Мый... Мый... лўмын огыл, пурен каен... А*

*тыйын мо пасат? Скемын киндем вет, тендан деч йодын налын омыл,* – рвезе чолгане.

– *Вот мо, кызытак нал, кочмет ок шу гын, мөнгет намиен кодо,* – Семон пенгыдын каласыш.

Изи йоча ала лўдö, ала вожыльо – кинде шултышым нöлтале, кўсенышкыже пыштыш. Но мөнгыжö ыш кай, пўя вельш куржо.

Ошкылеш Семон, а вуйыштыжо ик шонымаш пöрдеш. Кинде. Да, кызыт тудын акшым огыт пале. Эсогыл кугыен-влакат.

С у к ы р  
и з и ш к о ш -  
к а – в и г а к  
с ö с н а  
в о л ы ш .

Тыгай сўретым Семон ик гана веле огыл ужын. Школ столовыйыштат кугурак икшыве-влак пурлмо шултышым кодат. А тыгайже вигак вольык-лан кая. Да, огыт арале киндым. Аклен огыт мошто. А вот тудын ачаже кинде верч шке илышыжым пуэн. Тунам Семон улыжат ныл ияш лийын. Но тачысе гай шарна, кузе шыдаг пасушто пожарым йөртышыжла йўлен колышо ачажым пöртыш нумал пуртеныт...

Эрге кидтупшо дене шинчажым ўштыльö.

Мөнгыштö Семон омсагына почо, нерышке кўктен лукмо кинде пуш керылте.

– *Эргым, кудаш да кочкаш шич,* – ава сомыл лугыч пелештыш. – *Теве гына киндым луктынам... Чечас шулын ончем. Сайын кўын докан.*

– *Авай, кызытеш шулмет ок кўл, тевыс эше ятырак уло,* – Семон, ўстембачын кошкаш тўналше шултышым налын, ончыкыжо шўр тарелкым шупшыльö. Кызыт тудлан тиде уржа кинде ала-молан нимо деч тамлын чучо. **ФЛЕБЕДЕВАН сўретше.**



# Электровоштырым Олык Ипай күсле кыл дене тагастарен



## Йодыш-влак

1. Мо тугай «Ильичын лампычкыже»? Возен, сүретлен колтыза. «Ильичын лампыже йўла» почеламутым могай марий поэт серен?
2. Энергийым аныклыше лампычкым кузе маньт? Тудым кучылтын, плакатым але комиксым сүретлен колтыза.
3. Марий Элыште мынар сулло энергетик уло?

**2** Кокымшо йодыш-заданийлан ұдыр-рвезе-влак пеш онай сүрет ден комиксым колтенят. Татарстан Республика Мамадыш район Кугу Шия школ гыч эн шуко сүретым налынна. У Торъял район Тошто Торъял школ гыч **Ксения РОМАНОВА**, Н.Заболоцкий лўмеш 2-шо номеран Шернур школ гыч **Ксения СОЗОНОВА**, Морко район Коркатово лицей гыч **Юлия АНИСИМОВА**, Куженер район Шорсола школ гыч **Юлия ИВАНОВА** сүрет гоч моткоч кўлешан темым почын ончыктенят. Нуно электроэнергийым аныклаш ўжит.

чаманаш логалеш, шагалын палат.

Электровий да электротул дене кылдалтше конкурсам иктешлаш жап шуо. Толшо паша-влак шагалрак лийыныт гынат, йоча-влак пеш тыршенят. Йодыш-влакат кустылгыжак огытыл ыле.



**Жюри** (вуйлатыше – **Марий Эл Республика сулло энергетикше, мер пашаен В.А.НАУМОВ**) аклымыж почеш, сенышыш лектыт:

1-ше вер, 1,5 тўжем тенге премий – **Илья ГЛУШКОВ**,  
2-шо вер, 1 тўжем тенге премий – **Ангелина ФОМИНА**,  
3-шо вер, 500 тенге премий – **Юлия ИВАНОВА**.

Тиде йодышлан эн раш вашмутым **1** Д.И.Онар лўмеш Токтарсола тўн школын (У Торъял район) тунем шыже **Илья ГЛУШКОВ** пуэн. Тудо триолет аршаш кузе возалтм историймат кычал муын! Кузе от мокталте рвезым?! Тиде школ гычак **Ангелина**

**ФОМИНА** почеламут почеш сүрет-влакым келыштарен. Морко район Энерсола школ гыч **Лиана ден Ксения БУТЕНИНАМЫТЫН** пашашт шымлымаш дене ойыртемалтеш.

**3** Кумшо йодышлан вашмутым шуко кычалаш пернен. Марий Элын сулло энергетикше-влакын лўмыштым,

Сенгыше-влакым, тыгак конкурсыш ушнышо кажне йочам 1 июньышто – Йочам аралыме тўнъямбал кечын – Йошкар-Олаште вучена. Конкурсын учредительже **Виктор Андреевич Наумов** премийым «Изи мўжкы» пайремыште кучыкта.



**Ксения РОМАНОВАН** комиксше. У Торъял, Тошто Торъял.



Индекс 78574.  
Тираж 1300 экз. Заказ 1595.  
Формат – А-4-8.  
Директор-тўн редактор  
**Л.В.СЕМЕНОВА**.

E-mail: yamde\_lii@mari-el.ru,  
yamde\_lii@mail.ru  
Сайтын адресше: yamde-lii.ru,  
Тел. 45-25-49(факс);  
45-22-82.

**УЧРЕДИТЕЛЬ-ВЛАК:**  
Марий Эл Республикасе культур, печать да национальность паша шотышто министерстве, "Ямде лий" газет" кугыжаныш унитарный казенный предприятий.

Газетым Массовый коммуникаций сфериште да культур наследийым аралымаште законодательством шуктен шогым эскерше Федеральний службн Приволжский федеральный округысо управленийыштыже регистрироватлыме.  
Номер – ПИ №ФС 18-1999,  
2005 ий 10 февральыште пуымо.



Печатьыш пуымо жап – 14-00,  
фактически – 13-00.  
Ак – кутырен келшыме почеш.

Авторын да редакциянын шонмашыш тўрлў лийын кертыт. Серыш-влак мўнгеш огыт колталт.

Газетым редакцияшты погым да верстатлыме, «СТРИНГ» ИПФ ООО-што ямде оригинал-макет гыч савыктыме. Типографийын адресше: 424006, Йошкар-Ола, Строитель урем, 95.

Редакциянын да издателынын адресше: 424006, Йошкар-Ола, СССР Вооружённый Вийын 70-ше идалыкше урем, 20.



Тений  
27 августышто  
элна мучко «Кино йүд»  
всероссийский акций  
эртаралтеш. Тунам реги-  
онлаште ныл российский  
кином яра ончыктат.  
Могайым? Кино идалы-  
кын сайтыштыже  
(www.god-kino2016.ru)  
1 июнь гыч йүклымаш  
тўгалеш. Теат, лудшына-  
влак, ончыктышаш кино  
верч йүкдам пуыза!



**Тау, пожарный чүчү!**

Ик кечын класс дене посёлкысо пожар частышке мийышна. Пожарный машинаш шинчын ончышна. Пожар тўналме нерген уверым налмеке, пожарный чүчү спецвургемым 20 секундышто чиен шуктышаш улмаш. Пашашт пеш неле да лўдыкшө.

**Карина ЗОСИМОВА,**  
2-шо «В» класс.

1-ше номеран  
Морко школ.



Вич ияш эргыж деч аваже йодеш:

– Максим, эр кочкышлан тыланет могай пучымышым шолташ?  
– Вермишеляным, – вашешта Максим.



**Могай кайык нерген ойлалтеш?**

Тиде кайык чодыран верыште ила. Тушман деч шылын мошта.



❖ Люба  
**Тамаран**  
шенгелныже  
шога гын, **Тамара**  
раже кушто  
верланен?

❖ Могай олан  
лўмжө тудын  
шыде улмыжым  
ончыкта?

Пече  
вуйышто Вувер-  
куван кидысе гай көр-  
шөкым му да чиял-  
те.

**Чодырам аралыза!**

✗ Чодыраш пуримеке, тулым шекланен кучылтман.

Кукшо шудеш, регенчеш, иман пушенге воктене тулотым ылыжташ огеш лий.

✗ Шырпым йортыде кудалтыман огыл.

**Диана ТОПОРОВАН** сўретше.  
Советский, Ырша.



Шым ойыртемем му.

